

Kijan pou fè pou gen yon viza

Men ki sa pou fè si ou vle mande yon viza touris:

1. Ale nan nenpòt biwo SOGEBANK ak paspò-w epi peye san tranteyen dola meriken (\$131) pou jwenn yon randevou.

ATANSYON: Tout biwo sagebank yo bay sèvis sa-a eksepte biwo ki sou Lali a. Sèvis la disponib kote sa yo: Plas Jefra 1, Plas Jefra 2, Ri di Kè, Latan, Kafou, Kafou Fèy, Petyonvil, Dèlma, Nazon, Jakmèl, Okap, Sen Mak, Wanament, Jeremi, Okay, Gonayiv, Lewogan, Tigwav, Podpè.

1. Ale nan Konsila meriken an nan lè ak jou randevou an pou konsil la ka pale avè-w.

Kòm gen anpil moun ki toujou ap mande viza, li pa posib pou jwenn randevou touswit. Si wap mande viza ou sipoze fè demann lan kèk mwa alavans. Konsila-a pap remèt ou kòb pou randevou a yon fwa ou fin paye. Moun kap mande viza A, G, C-3 ak kèk viza J-1 pa peye pou konsila-a etidye dosye sa yo. Gen kèk nan òganizasyon etranje ki ap fè zèv imanité ke Depatman Deta Meriken rekonèt ki pa peye non plis.

Ki dokiman pou pote jou randevou a:

1. Fòm [DS-156](#) ke tout moun dwe rampli sou òdinatè. Moun nan dwe reponn tout kesyon yo poze-l nan fòm nan. Fòk li li-l epi fè-l sòti nan machin sou papye. Se pou jwenn twa paj lè-l fin sòti. (ATANSYON: gen yon ba nwa ki sou twazyèm paj la si li pa parèt klè e pwòp ou dwe refè fòm nan. Tout moun kap mande viza dwe ranpli fòm nan sou entènèt. Konsila-a pa aksepte fòm ki ekri a la men ankò.)

ATANSYON: Tout gason ki gen 16 rive 45 lane dwe ranpli yon lòt fòm an plis ki rele DS-157. Ou kapab ranpli fòm DS-157 la ak plim oswa tapel nan machin. Fòm DS-157 la gratis e ou ka jwenn li anndan konsila-a.

2. Resi SOGEBANK ki montre ke ou te peye santranteyen dola meriken an (\$131).
3. Yon paspò ki gen pou pi piti si mwa e ki pap ekspire pandan ou Ozetazini. Ou dwe pote tout ansyen paspò-w si-w te konn gen viza.
4. Yon foto idantite ki pa gen plis ke simwa depi ou te fè-l.

Kisa tout moun dwe konnen:

Li enpòtan pou tout moun konnen ke konsila-a pa mete deyo yon lis dokiman ke moun kap mande viza dwe pote. Men se moun kap mande viza-a ki dwe bay konsil la prèv ke li pa gen entansyon al rete Ozetazini e ke li gen bon jan rasin sosyal ak ekonomik kap fè-l tounen an Ayiti.

Konsila Meriken an pa negosye magouy nan zafè viza. Se sak fè tout moun dwe bay verite sou rezon ki fè yo bezwen pati ak sitiyasyon pèsonèl yo. Pèsonn pa dwe bay fo papye, ni achte dokiman nan men raketè. Yon moun bay konsil la fo papye gen dwa paka janm ale Ozetazini. Sa vle di li ka pa janm jwenn viza meriken. Sa ki pi grav la, li ka menm ale devan la jistis pou yo jije-l selon la lwa ayisyen.

Okenn moun pa dwe pran pawòl nan men raketè kap ofri dokiman, èd, oswa kap di ke yo gen kontak anndan konsila-a ki ka fè yon moun jwenn viza. Si yonn nan yo ta vin pale avè-w, ou dwe di konsil la sa, ou byen di yon sekirite kap travay nan konsila-a sa. Se sèlman yon konsil ki ka pran desizyon pou bay viza e desizyon sa ap chita sou lalwa meriken.

Konbyen tan li pran pou jwenn yon randevou:

Dat randevou yo chanje de tanzantan. Pou jwenn plis enfòmasyon ale sou paj entènèt sa-a: http://travel.state.gov/visa/temp/wait/tempvisitors_wait.php

Konbyen tan konsil la pran pou-l etidye dosye yo:

Tan ke yo montre sou paj entènèt la se sipozisyon sèlman paske tan an ka chanje ak kèk sikontans. Gen anpil lòt kontryete tankou pèmisyon espesyal, fòm ki mal ranpli, envestigasyon, ki ka retade yon dosye. Fòk yon moun prepare dosye-l bonè pou-l ka evite reta.